

金
文
通
公
集

金文通公集卷之十二目錄

吳江金之俊豈凡著

光祿大夫內弘文院大學士岱輿高公墓誌銘

光祿大夫太子太保左都御史望仁徐公墓誌

銘

光祿大夫太子太保工部尚書管都察院左都

御史魯齋霍公墓誌銘

光祿大夫太子太保弘文院大學士蒼忱呂公
墓誌銘

金文通公集卷之十二

吳江金之後豈凡著

光祿大夫內弘文院大學士岱興高公墓誌銘
順治十有二年乙未春三月靜海孝廉高君恒懋持
其先人宮保岱興公狀來乞余銘以余與公同朝者
十載且後先同官爲中西銓尋又相繼入政府習公
最久知公最深因泣而請曰孤不忍先君子德行泯

沒無聞。求誌其生平而系之銘。以垂不朽者。舍先生誰屬哉。余惻然于中。而誼有弗獲辭也。謹按狀公諱爾儼。字中孚。號岱輿。別號鉢菴。先世家靜海縣西宗保村累傳有隱德。不事聞達。王大父一峰公。諱萬億。始筮仕爲鴻臚。好義任俠。以不畏強禦稱。高氏聲乃振。大父拱吾公。諱如斗。未仕。克紹家聲。父望雲公。諱攀桂。貢士博學篤行。邑之人號爲古君子。生丈夫子。二長郎。公生而穎異。七歲善屬對。矢口驚人。塾師奇之。曰。吾不能爲若師。遂辭去。十歲能文章。十五應童

子試郡邑皆冠軍。時督學御史爲桐城左公光斗。有文名。閱公卷。亟稱之曰。此他年宰相材也。首拔之。如郡邑十六歲食餼。每試輒前茅。其爲文根本經史。磅礴變化。如江淮河漢之水。滙之有源。發之莫禦。吮毫伸紙。頃刻立就。年二十。登丁卯賢書。公車數上。不利。益扃戶讀書。恒夜漏數十下。方就枕。雞鳴卽起。如是者十有三年。績有高伯子制義。自嬉草古處堂全稿。漸堂初集。一時紙貴洛陽。雖處困約。未嘗一謁有司。當事者表其廬爲眞孝廉。庚辰成進士。受知姑蘇徐

公汎先生見而喜曰子殆韓范一流人。闔閭時早以文卜之矣。廷對擢第三人。授翰林院編修。晉江蔣公德璟爲館師。每謂人曰高太史器識宏遠。他日功業必有大可觀者。因贈以手評資治通鑑經世入編。二書辛巳五月丁母夫人曹氏艱訃。至哀毀逾節。大病幾不起。又恐傷望雲公心。恒強顏侍側。以冀解慰退。則淚未嘗乾。也是歲畿輔旱蝗。人相食。公施粥倡賑。全活饑民無算。癸未秋服闋時。更期八月會試。例應充同考官。公以母服方終。因謝分校。延至撤闈後始。

陞見其恬退類此尋補原官纂修六曹章奏充經筵
展書官起居注時寇氛漸逼都門當國者束手靡措
上震怒罷井研併及晉江特用通州爲首揆公上疏
直晉江忠誠體國不宜與井研同罷爭甚力執政晦
之公弗爲顧甲申之變抱封公痛哭幾絕忍死避跡
會

皇清定鼎授官如故乙酉四月擢內翰林秘書院侍讀
學士充修史副總裁

詒敕撰文七月陞禮部右侍郎比禍亂初平修文伊始

諸凡辨等威。定民志。端教化。正風俗。公悉心考訂。酌古準今。務得大體。丙戌二月。充知貢舉官。爾時道路多梗。四方公車弗能如期達。特請展期十日。以網羅後至。丁亥再行會試。有失文引者。苦格功令。公慨然曰。士子間關數千里。觀光上國。此

朝廷收拾人心一大機括也。奈何格之。議取同鄉結狀。俱得入闈。三月奉

旨。京官三品以上遣子入朝侍衛。公顧謂己子曰。汝叔子恒豫。幼失母。吾與汝母撫若已出。當令叨是恩。以

識吾顧復之意已而得除同知高郵州戊子八月調
吏部右侍郎己丑十月加都察院右都御史辛卯三
月轉本部左侍郎八月晉本部尚書又以

恩詔加太子太保由東西銓正位冢宰凡閱歲者四職
掌所關必求與吏治民生大有裨益至黜陟之際鑑
空衡平無方隅無德怨處滿漢寮屬間推誠相待弗
形一毫崖異之色以故同事傾心其用人之精當他
不具論如趙公開心以僉院起用晉補左都御史房
公可壯以前朝耆碩久滯卿貳特從副院竟轉左都

御史龔公鼎寧以奉常服闋來京會有齠齶之者越
兩年不得補。公卽補爲館卿。凡若此皆最愜輿望者。
也後言路有摭拾銓曹事許。

奏詞連公。公閨門謝客疏請罪。

廷質之日。言者盛氣抗爭。公不與辯。惟以負
國負官深自引咎。願早罷斥。

上鑑公無他卒左遷言者而堅留公。公之休容得大臣
體。尤爲近代罕有。公姻家大司農戴公明說。先年貳
司農時。無端落職。將外調。時公論咸抱不平。公心知

其寃獨勸以人臣盡忠事主勿計內外且
明旨煌煌須一行塞忌者口遂補中州參藩戴公亦怡
然就道尋大著聲譽甫踰年膺

內召公之不阿所親而遇事卓然有識槩可見也孝廉
有胞弟恒泰年少負雋才壬辰正月遽以病卒公痛
之甚五月夫人姜氏又久病繼革未半歲疊罹悲傷
復拮据銓務靡有寧晷遂以勞瘁得瘤症月每一作
乃具疏請告

上弗允十二月以覃恩晉階光祿大夫封三代如已官。

癸巳二月。因前疾弗瘳。再請得。

旨謝事靜養隨蒙

遣使存問飲食起居狀并

命御醫調治回奏未幾特起內翰林弘文院大學士疏辭不克奉有准調養十日卽入院辦事之

旨三月二十一日。

上幸內院公偕同官行禮訖正鵠侍間疾忽作。

上瞿然色動令左右諸大臣送歸邸寓次日復上章懇辭准暫停給俸以便調養久之醫藥罔效甲午正月。

方得

旨回籍俟病痊召用九月初七日爲望雲公七袞誕辰。公父子祖孫懼聚一堂捧觴戲彩宗戚鄉里榮之居。亡何病益劇忽一日書于枕次云直心是大道無將迎無繫戀至十二月初二日呼孝廉君設香案被朝服伏枕草遺疏畧云開經筵以懋

聖學懲貪吏以拯民生扶掖望

闕叩頭戒以易簣賈奏語不及私初七日早望雲公就視絕口不言病苦以生老親憂惟眉睫間有悵焉不

忍離別之意。語孝廉君曰：汝去我且休息。遂含笑而逝。公生于萬曆丙午年十一月初六日卯時卒于順治甲午年十二月初七日辰時享年四十有九。

天子覽遺疏嘉其忠愛纏綿爲咨嗟悼惜者久之下所司優議卹贈以聞嗚呼跡公之生平併觀公枕次所書之數語其殆有得于道而深造聖賢之域者歟公真不可及也已公性篤孝友事二人色笑惟謹雖盛暑隆寒不冠服不敢見每侍左右不命坐不敢坐終身如一日視弟之子逾已子遇國有恩施輒先及之

與人交表裏洞達通而不阿正而不諒樂道人之善而未嘗及其惡

上之簡公端揆也。有存心醇謹行事和平之褒嘉。蓋灼見公之行已立朝者公洵能不負

聖天子知人之明哉。休沐之暇手不釋卷博覽古今得失之故。究心天人性命之理。嘗命其子曰。有百行必求諸聖訓無一事不可對天知吾之志在是吾之行亦在是。汝當終身識之所著有西銘衍義孝經釋畧感應篇直解行世。公嘗爲其邑請蠲荒地錢糧萬餘

金除亡丁銀六千餘兩。邑人至今賴之。頻年宦京都。
粥饑者衣裸者以至掩骼埋胔。歲以爲常。此又吉人
爲善。惟日不足之天性。在他人爲之則義聲震耀。便
誇爲卓絕難能之事。于公之身。僅區區一端耳。嗚呼。
公真不可及也。元配姜氏。原任陝西漢中府知府。文
安姜公諱銓之女。先公二年卒。

詰贈

一品夫人。子二人。長恒懋。辛卯舉人。娶王氏。都察
院僉都御史巡撫延綏王公正志姪。廩生翼聖女。次
恒泰。邑廩生。早卒。娶劉氏。癸未進士。刑部郎中。劉公

世孫女三人。長遼原任河南巡撫。公默之孫廩

生。公任之子國學生。

釗次適原任臨洮府同知

姚公思虞之子國學生。姚景申三適原任汾州府推

官蕭公賦穎之子庠生蕭濟美。孫男一緝。睿官生恒

懋。出未聘孫女一恒泰。出未字卜。以其年某月某日

葬于某邑某鄉。爰爲之銘曰。

公生非偶忠誠孝友。學本經史材追驥騁揚聲天路。編摩獨步其典禮也。維直而清其統鈞也。維簡而平

百司所視。

天子所器。方資濟川。胡不百年。有子繼武。有孫繩祖。積厚流光。公也不亡。

光祿大夫太子太保左都御史望仁徐公墓誌

銘

順治十有六年歲次己亥秋台州府大夫丞徐君諱祚
殮泣持其先人總憲望仁公行狀來屬余誌其墓
而併爲之銘以余與公同朝十餘載且先後相繼同
官凡公之立朝行已與夫生平駁歷中外之真品大
業炳炳烺烺得之耳聞目見者最爲委悉余雖老病
無文誼不能辭謹按狀公徐姓諱起元字貞復別號
望仁遼東遼陽人也先世爲江南廬州府合肥縣人

明初以軍功徙遼。遂家焉。世簪纓勿替。遠不及詳。公考明川公以孝友著。聞遼左碩德粹履。有陳太丘風。公妣董太夫人。淑慎柔嘉。六行咸備。生丈夫子一人。是卽公。公生而警敏沉毅。少不好弄。治麟經。補博士弟子員。試輒高等。壬子登順天賢書。癸丑下第歸。益篤學礪行。一時學者爭延致爲師。今少傅萬涌。甯公亦嘗從公受業。庚申秉鐸山東淄川訓士之方。悉倣胡安定公先德。行而後文藝。淄川士習蒸蒸。一變辛酉。丁外艱。服闋補河南閩鄉諭。所以訓閩士者如淄

閔弟子愛敬而信從之。亦如淄已已授湖廣保康人。
保康彈丸邑。戶不滿三百。皆家鮮宿春。一切日用所
需。必取辦隣壤。又居萬山中。巖谷迂迴。往來甚艱。公
爲百計籌畫。置立集塲。平其關石。通其有無。俾強暴
不相侵。智巧毋相奪。商賈廢至。邑民賴以稍蘇。邑南
有湯峽河。可以達天河。抵襄陽。奈萬蓮洞口。有巨石
礪屹橫塞。河泓公審觀形勢。令居民沿山伐竹木烈
而焚之。不三月間。巨石剝落殆盡。卽五丁開山神力
當不過此。于是峽平水注。凡入山採木者。順流而下。

直達樊城可得倍值地方至今猶蒙其利也壬申丁
內艱丙子補湖廣應山令時流賊起自秦隴蹂躪楚
豫勢方披猖而應適當其衝公蒞任察城守之具百
無一備爲之築壘濬濠修櫓繕器捐橐中資募壯士
千餘人躬自簡練務人人可用以防不虞未幾賊渠
八大王張憲忠突逼孤城公親率壯士邀擊屢戰獲
捷所得甲仗衣畜無算賊鋒首挫忿圖報復羣賊如
闖塌天整世王一斗粟滿天星老徊徊等環集城下
悉力仰攻公爲整備火器乘城禦之神暇而氣壯賊

咸失利去比應之隣邑望風降賊者衆獨公固守四載屹若金湯匪但治行卓越爲諸道最而武功赫然尤一時艷稱未有已卯冬大計吏撫按交章薦剡爭言當大用公了此賊不難會閣部督師至亦素重公望題授鄖陽同知管鄖鎮餉時鄖兵萬餘屯住竹山縣自鄖至竹六百里而遙河身淺窄以小舟溯流牽挽歷灘百二計半月方達又大帥左良玉馬步兵三萬餘屯興安縣亦移竹就糧較原住竹兵數且三倍焉公慮兵多糧匱不免庚癸呼乃向治院繼咸袁公

假步兵五百晝夜協運七日卽至以蕞爾山邑屯兵數萬轉餉不竭公之力也適太守缺當事者舉公署府事旋實授公感激奮勵于戰守機宜靡不殫力料理辛巳八月張憲忠領賊衆數萬攻城公備禦已預用火器中其左臂賊踉蹌走壬午十二月闖賊李自成從白馬洞渡江攻陷襄陽而南陽承天荊州等處所過州邑俱望風瓦解湖北半楚孤存一鄭耳賊意且輕鄭遣騎萬餘徑抵城北安營以爲鄭可旦夕下也公督率壯士躬冒矢石出敵不意直躡其營所殺

傷凡三千餘賊乃宵遁癸未二月賊驍將劉宗敏等
統馬步五萬攻城三面環遶其鋒甚惡公約衆歃血
誓曰今日之事有死無二且歷數某處某處順賊者
卒被慘戮將士爲之感動皆泣下如雨無不一以當
百乃部署諸將分方迎敵終日對仗凡枕戈擐甲者
七十餘日賊死傷過半竄歸襄陽癸未四月賊復來
用麥杆雜土于黑夜築臺三層距城百步許高與城
齊計四十五座駕砲擊城城內人望而却立勢且岌
岌公謂諸將士曰鄭之存亡在此舉矣與其嬰城兀

守易若以戰爲守而守乃固于五月三日傾城兵出戰用火礮火箭燔燒麥臺頃刻而四十五座立燼賊聞之親督精銳來援行至浙川知火器精利且士皆殊死戰度弗能敵因轉鄧州回襄陽尋渡河入豫迎敵孫督秦兵秦兵不戰而潰遂乘勝入關中據險僭亂當是時鄖西北偏漢中興安商雒一帶處處署有僞官獨鄖陽孤鎮四面皆賊內無糧餉外絕救援如擣漏舟于瀕天駭浪中不覆溺者幾希是年秋廷議錄公之功擢陞副使隨晉鄖陽撫治公益感知遇

嘔心經理寢食靡遑時鄖所亟需者火藥公乃令各營俱設硝房掃土淋煎而硝足矣礦不給乃用火酒煮硝功與礦等礦足矣鉛又不給乃募市廢鐵設法鼓鑄圓如走珠自是火藥不勝用矣從襄陽陷後餉道梗阻公多方曉諭居民俾悉出益藏樂輸靡後不數月而民間儲蓄告罄又倡率寮屬竭力捐濟不數月而官索又罄惟相率拾野菜剝榆皮採橡實聊以充腹僅免易子析骸耳公偵知賊有糧艘屯河下募死士夜駕小舟順流而下乘其無備奪取賊船賊窘

攻城益急護糧益堅公又夜遣人以火箭焚之賊糧悉盡甲申正月闖賊以鄭久不下復令驍將路應標等來攻計四十七晝夜公身先士卒奮勇堵禦斬馘無算賊將僅以身遁三月又令賊下得海等益兵萬餘來攻仍敗遁如前五月又令驍賊武寅臺等二人來城下要盟云中原大勢已去孤鄭在重圍中糧盡援絕能支幾時盍早自全公義憤填胸卽城下斬之誓不與賊俱生賊知公忠義難撼甚于城堅不可拔乃更益兵列營爲持久計公復出奇謀多方以禦之

夜襲以擾之。使賊片刻弗寧者六閏月。賊憊莫支退。
營楊溪舖別築土城自守。時縱遊兵突城下。公應之。
愈暇愈整。每偵賊出營。卽遣奇兵迎敵。以挫其鋒。十
二月六日。公親統銳卒薄土城下。索戰復密遣人入
賊營爲內應。夜半火發。內外夾擊。賊大窘。開東門逃。
竄乘勝追擊。殺傷殆盡。賊帥路應標殲焉。方期露布
告捷。而明代已革九閱月矣。嗟夫。明以天下之全力。
不能守其九廟。而公未嘗擁重兵資厚餉。獨以兩袖
清風。一腔熱血。守張巡許遠之所不能守。終明之世。

中原板蕩孤鄖屹然以待

皇清定鼎之日完而歸之猗歟偉哉今

天子嘉公全城殊績仍令撫治如故公爲起瘡痍集流
散戢綏彌至于是鄖之人感公福澤家戶戶祝特爲
畫像立祀丙戌擢都察院左副都御史協理院事公
廉有聲戊子陞掌院事左都御史己丑晉階太子太
保正直和平始終如一不矜圭角人自不敢干以私
辛卯公念明川公已葬淄川而董太夫人櫬尚寄金
陵因乞假返歸合葬于淄壬辰

聖上眷倚老成。仍命以原官管大理卿事。公循例引年。
蒙

恩許允典。禮優渥。公始得以險阻艱難備嘗勞瘁之身。
卜別墅于都城西南隅。負郭臨流。稍憇息焉。每佳辰
月夕。與親朋握手道故。浮觴嘯咏。竟日忘倦。白鬚飄
然。頽赭若童。人望之。羨爲神仙中人也。戊戌九月初
五。竟無疾而逝。嗚呼。公之爲人也。軌步趨矜然諾。
孝友篤。有性生忠義。助以學問。衾影夢寐。恒自期爲
聖賢。教人子弟。亦期共爲聖賢。自起家縣令。以至建

牙開府無不身視民家視國故百姓愛之如父母士卒護之如頭目以之守城城完以之攻賊賊破豎蓋世無前之偉烈垂千秋不朽之令名然未嘗沾焉向人稍有德色至歿之日囊橐蕭然幾無以殮此在他人爲最難得者清節于公之生平直其一端也若夫待昆弟無爾我撫諸姪若已子九世同居不析箸緩急族鄰靡有厭倦心則又皆公制行之緒餘已公生于萬曆乙酉年七月二十六日未時卒于順治戊戌年九月初五日卯時享年七十有四卜于某年月

日葬于某所。元配趙氏一品夫人生子一。卽祚煥。以侍衛歷官台州府同知。甫蒞任一日。卽值海賊陷城。賊逼降。抗不受。僞職卒護憑赴省。此蓋得于公之教。患者素也。生女一。適海州守忠鵠李公長子。一元候選縣令繼配郭氏。一品夫人生女一。未字。祚煥配卞氏。平定州守圖閣公女。繼楊氏。瓊崖叅將苑青公女。繼董氏。貢士峻明董公女。孫一天培。配甯氏。內閣大學士萬涌公女。姪國禎。任磁州叅將。祚炳。任清苑縣令。姪女二。一適山東巡撫青藜耿公。姪子明候選京。

職一適江南操撫君砥蔣公長子爲之銘曰

公篤生兮稟星辰。公制行兮侔古人。公司鐸兮安定
均。公烹鮮兮召杜倫。公建牙兮威且仁。公禦寇兮若
天神。鞏孤城于磐石兮。傲徇節之張巡。雖世代忽滄
桑兮。賴忠義之獨伸。垂紳正笏以肅紀綱兮。憲度維
新。屈指懸車而娛泉石兮。二百餘旬生也榮死也哀
兮。輝茲貞珉歲可遷石可朽兮芳名詎渝。

光祿大夫太子太保工部尚書管都察院左都
御史魯齋霍公墓誌銘

順治十有八年歲次辛丑夏四月左都御史魯齋霍
公卒其孤恩廕君將扶櫬歸里經營窀穸而以其狀
來請余銘且泣告曰孤奉先君子遺命銘我者必先
生也余聞言不覺涕泗交頤憶余與公先後同朝二
十年世閱滄桑交情有如一日習公最悉佩公最深
誼不忍辭按狀公諱達字非闇號魯齋始祖武節大
夫諱吉者本居真定府之南宮縣至四世祖諱玉侍

父端祐公宦遊秦隴。因家麟遊。遂世爲秦人焉。六世祖諱瑞遷鳳翔。逮數傳而諱導者是爲公王父。徙武功。公考貞吾公諱正始。家長安妣閨太夫人實生公。公生而穎異不凡。六歲卽解句讀。恒善病。太夫人育且誨之。辛勤倍至。無何太夫人病革。公甫七歲。哀慟呼捨。迫于至性。觀者無不嗟異。是年冬就外傳。日輒數行下塾。師奇之。繼母徐太夫人視公無異。已生公。爰克成立。歲十九。補博士弟子員。旋食餼。蔚然有聲。督學使者每試輒優其等。甲子薦于鄉。辛未成進士。

本年七月除山東淄川令。冬十一月有脫伍悍卒自吳橋謀廻。所過焚掠。連陷數城。齊東大震。時公新任。方詣省謁諸臺使者。聞警星夜馳還。整頓城守。不五日畢具。及譁兵抵境。知有備。輒引去。淄民安堵如故。撫按以守禦功上聞。適徐太夫人訃至。公摒踊哀號。亟請解綬奔喪。當事者以賊勢方張。城守捍禦非公不可。疏留不獲行。抑哀備賊。凡七閱月。得代回籍。喪次哀毀逾節。先是公以寒素通籍。筮仕未及週窮約甚。于諸生多方拮据。情文俱備。宗族鄉黨咸稱純孝。

焉。乙亥服除，補山東曹邑令。時流寇披猖，曹首當其衝。自莅任後，寇突河干者五。公設方畧，嚴兵待之。寇憚，不敢逞。境賴以寧。爾時大河兩決，奔流激射，汎濫桑田，民幾魚矣。公爲繕隄防，疏壅滯，卒殺水勢，畚鍤無患。用是勞績茂著，兩奉截俸行取之旨。丙子甫入閹分校，寇復逼河干，總河檄公星回堵禦，詰獲三奸細，遂過河奮勦，斬四級。寇憤息遠遁，優叙其功，以聞。丁丑冬考滿，公考妣均封如其官。戊寅十一月，廷議各舉邊才，有司就近調補，以鞏固畿輔。僉謂公才望

堪勝將調寧晉。曹民聞之，遮道攀轅。總河復疏留守。
曹遂止不調。曹城頽圯，有同短垣可踰。城內居民鮮
獲寧止。公設法督葺，不鞭一人。不費民間一錢。浹月
竣工。至于絕火耗鋤蠶豪，講學勸農。凡爲良吏之種
種美政。于公直餘事也。迄今曹之父老猶娓娓言之。
己卯四月，聞父喪，趨戒行，抵里撫柩痛哭，幾不欲生。
殫力從厚以襄大事，奉兩太夫人合葬于曲江之原。
辛巳服除赴闕，候考選，以召對稱旨，授試江西道監
察御史。巡視西城，時丁明末，士大夫方隅恩怨，物而

不化情面賄賂。溺焉忘返。公獨凜凜以正氣自持。不
福不隨。糾彈權貴。未嘗稍假。有真御史之稱。比時漕
政弊極。東南四百萬石之玉粒。嘗踰年不得登天府。
一則寇氛充斥運河。漕艘莫敢前。一則河流淤淺苦
蔓草糾葛。輓洩無計。而其原皆起于有司之徵兌愆
期。運弁之驕橫不法。奸旗之恣意盜折。上赫然震怒。
下令曰。漕務等平軍機。凡大小漕臣。有安常襲故。莫
能挽遲爲速者。必罪不赦。于是冬十二月。特簡公巡
漕。余時備兵南昌。已移固原將行。會漕科偕撫按合

疏留督江西糧。不得已黽勉從事。與公周旋漕務者。一年見公所措置。嚴而不苛。廉而多惠。軍民屬吏。皆畏之。感之。是年漕艘悉抵通。卒如令。挽遲爲速。公之力也。上書公名于御屏。眷愛有加。壬午以督運功實授御史。加俸一級。癸未又以守護白糧功。加一級。繼而寇陷關中。遠邇震驚。總憲吉水李公保奏公監總督軍公計恢復關中。非重兵不可。因度淮招集將士。用圖大舉。甲申難作。一片忠肝義膽。竟付之東流矣。乙酉以浙閩總督張公薦。奉

旨着來京陞見丁亥授山東道監察御史戊子巡按福建時地方初席版箇人心搖搖公疏舉賓興偕兩典試闈櫟莽而入肇舉賓興大典以收士心仍宣上德意家喻戶曉而八閩之風鶴大定辛卯

先皇帝親政磨勵人材內外兼轉以公才優幹濟補嘉湖兵巡道山廠湖畔正多伏莽所在竊發公一至縛渠宥脅寇孽屏息一切剔蠹除奸得其要領不事鉤索境內肅清吏治民生咸蒸蒸有起色癸巳大計吏督撫按會舉卓異第一

部覈實賜宴賜袍晉太僕寺少卿甲午轉太常寺
少卿提督四譯館七月轉大理寺少卿乙未三月陞
本寺正卿讞鞠多所平反人稱不冤

先皇帝謂督捕一官非嚴明仁恕兼而有之者弗克勝
任四月陞兵部督捕右侍郎此官設自本朝而以緝
逃懲窩充實禁旅不意營窟彌深根株彌濫不得不
特立嚴法冀法重難犯乃有以一人之逃而株連數
家有以無知之僕而干累職官甚且假稱逃人嚇詐
善良而地方百姓多罹籍沒竄徙之重條然各旗報

獲之數卒不勝報逃之數

先皇帝每爲惄然動念頻頒

諭旨講求良策自公受事卽條上便宜數十欵嚴窩藏之律立黥刺之法定考成之例申保甲之令著爲令典于是有司爭自濯磨愚民亦懼扞綱數年來逃者無所容假者不得肆地方旣鮮株連職官亦免于累所全活人不可數計丁酉六月以

恩詔加一級戊戌十一月考滿加兵部尚書給與應得話命鑒一子入監讀書已亥三月奉

上諭加太子太保。庚子二月調工部尚書時。

先皇帝欲合祭

地於大享殿限一月竣工。公竭蹶以圖。如期告成七月奉

吉仍以太子太保工部尚書管都察院左都御史事。公

感

先皇帝知遇之恩膺紀綱重寄殫力振作不辭勞瘁。凡有裨民生吏治者必昌言無隱。冬十月遂患痰疾猶勉強辦事。十二月疾勢漸劇。今年正月初八日痛遭

先皇帝賓天。力疾哭臨。勉竣喪禮。病益篤。及回寓調理。
醫藥罔效。竟爾溘焉長逝。嗚呼。公直可謂鞠躬盡瘁。
以死勤事者矣。公通籍三十餘年。除兩次讀禮家居。
外餘悉歟歷仕途。憂公忠職。無一優游晏衍之日。出
爲外吏。則洞悉民隱。芟除奸盜。所至見德。所去見思。
入爲京朝官。則諳習國體。明解朝章。氣節稜稜。儼不
可犯。而胸無城府。益然迎人于光風霽月之中。雖位
躋三事。年逾花甲。而猷畧未竟。精力方旺。胡期昊天。
不弔。遽奪我老成典型。令人翔顧班聯。中悵然失所。

仰止嗚呼誠深爲可痛也已訃聞之日兒童走卒盡爲咨嗟涕洟

上深悼焉。俞禮臣請祭葬悉如例。元配可夫人並得祔葬。仍遣官護其喪歸。生榮歿哀保有令名以終。然則公抑又何憾也哉。公于學無所不窺。政事之暇沉酣經史。搜稽典故。旁及竺乾諸書。靡不探微抉奧。所著有屈黃二騷合編。手校字彙。併楞嚴金剛經註解行世。近有編訂史記一書。尚未付梓。公生于萬曆庚子卒于順治辛丑。享年六十有二。公祖若考皆贈資政

大夫兵部尚書母閔氏徐氏皆贈二品夫人元配可
氏贈二品夫人生丈夫子一卽恩廕君于京娶辛未
進士通奉大夫江西右布政使任公中鳳女繼配紀
氏生女一適甲戌進士中憲大夫山東提學道任公
中麟三子貢監生知民繼配袁氏封二品夫人側室
崔氏吳氏皆撫教恩廕君不異已出孫一昭尚幼爲
之銘曰

天挺鉅公繼霍司空起家民牧兩最齊封晉秩栢臺
蹇謁著節乘驄督儲轉運若決入閔持斧手闢荆榛

招携懷貳惠洽海濱嘉湖二郡伏莽淵藪借公備兵
革心恐後卓異彰聞增秩賜衣京卿屢陟羣望攸歸
特簡佐樞矢口石畫誘致逋亡如依祉席稽核水農
麌冒悉釐領袖風紀澄清是資展也老成高止是仰
九原不作曷深慨惄

皇有卹恩瞻懷名碩歲月遷兮我銘無斁

光祿大夫太子太保弘文院大學士蒼忱呂公

墓誌銘

康熙六年歲在丁未二月朔故太子太保弘文院大學士蒼忱呂公歸葬於常州府武進縣繆賢壩之新阡其子恩廕生方洪等叙公生平懿實來乞余銘其墓嗟乎呂公自登第以後出入中秘者六載晉登揆席者一年與余後先同官寅恭交勵惟余最知公惟公亦最愛余惜公先以病去于時

朝廷眷公甚厚中外咸倚重公謂公年方強仕旦晚病

且愈當膺

命還朝一竟匡勦太平之業。孰意夙疾糾纏卒至不起。
嗟乎余何忍爲公銘然余與公旣相知久且厚且濫
職舊史氏于大臣宰相名言嘉行並宜得書余又何
敢不銘公也謹按狀公姓呂氏諱宮字長音號蒼忱
別號金門爲常州武進縣人其先世自漢尚書霸累
傳至宋如文穆文清皆以賢宰相著嗣後不乏名臣
具載史冊不勝書至洪武永樂間遷居郡城又六傳
至公大父遂南公諱應徵好修積行多隱德公考

敕贈修撰待贈光祿大夫翼之公諱程雲學富才高資
志未酬公妣

敕贈太宜人待贈一品太夫人諸氏婦道母儀則微里
黨發祥厥有其自矣公童年穎異目數行下遂成誦
不忘甫四齡考早世從大父授書不離膝前常以方
名書記粘示隅壁每夜繞隅燃燭示之公輒神會是
時公方零竹孤苦而大父喜甚以爲是必能大吾門
也迨就外傳卽好讀書入歲屬文有能名公母教綦
嚴丙夜督課親績紡以伴之公痛念孺母望子殷切

力學之志彌堅。斷蠱焚膏，刻自勉勵。性冲淡無所好。與人藹若春風。坦無城府。而持身方正。不愧屋漏。嘗于某氏館中夜讀。有鄰家少婦。忽乘月而至。公毅然峻拒。不稍動心。次日復令侍婢持雙玉魚來贈。公卽碎其玉而厲聲責之。婢慚而退。然未嘗與人言其事。及後課子因訓曰：「讀書人積陰德爲上。我曾遇某事云云。然終不洩其姓名。少時不利童子試。年二十七。始補博士弟子。請于母氏以居。諸易邁顯親無期。不得不離家習靜。以圖一當。遂至金陵遠公菴閉關攻

苦者三年。至癸酉試南闈。時漏下四鼓。僅完六義。僉
神思困倦。睡魔來牽。忽有人撫其背曰。如何不作文。
遂驚寤。見巨人昂立。倏失所在。時天已將曙。捷書而
出。是年登賢書。受知于楚中徐中濤先生。主考閩中。
蔣八公先生評牘云。一縱一橫。論者莫當得眉山之
神理。蓋公沉醉古學。尤篤好大蘇。爲文奔騰激射。宛
轉迴旋。不可方物。故評卷云。云旣而困公車者。一十
五年。研精苦思。益發憤揣摩。至甲申乙酉間。尤加刻
勵。無間酷暑嚴寒。宵旦不輟。甚而繼以泣。且泣且讀。

卽懸針刺股不是過也迨

皇清啓運丁亥應春官試初成三義殊不愜意午過卽
束卷欲出鄰號勸阻復靜坐構思一揮而就淋漓滿
志恍有神助焉及

廷對辰值大雨遺去銅格式同輩爲之惋惜旣而濡毫
落紙精整異常字或將訛若有掣其肘者輒得改正
自鄉會迄奏對累著奇兆具詳公勸戒士子文中不
可謂非陰德之驗也

賜擢第一授翰林秘書院修撰邀

聖恩知遇時人榮之而公退然如未遇時出入承明謹
悉有加鄉邑中曾不知有鼎魁也歲辛卯恭遇

世祖章皇帝臨朝親政公奉

命頒詔江南乘傳錦歸畧無德色意里人益加重焉壬
辰舉春官試公與分考所鑑拔房卷醇正爾雅時有
廬陵較士之譽是歲遷右春坊右中允時

世祖章皇帝特召館員親試君子懷德論請建常平倉
疏條對上呈獨公當

上意隨奉

傳諭云。翰林官陞轉舊例。論資俸兼論才品。朕思果有才品出衆者。何必拘舊例。右春坊右中允仍管秘書院修撰事。呂宮文章簡明氣度嫋雅。朕所親見着。遇學士員缺。卽與推補。以示破格用人之意。遂超陞學士。不半載。晉右少宰。公益勵冰檗。

帝眷彌隆。歲癸巳冬。特進弘文院大學士。甲午春二月。余亦由中銓濫廁公後。獲與公晨夕周旋。公以文章氣度受知。

天子參預國是。言無不當。議無不行。凡所以上裨。

宗社下福蒼生者惟公協贊之力居多用是

天子嘉焉萬幾之暇時召入大內發古今書畫命公題贊又命遍題內宮額聯公乘機納牖因事進規格言莊偶盈列禁中誠得大臣以道事君之要也公以六年翰撰邀異數驟登揆席一時忌者不無間言公絕不尤人惟翼翼引咎力求罷斥幸賴

天王聖明燎若觀火勉以盡職用息多口然機務殷繁積勞成瘁瘍火交作兼患疝氣相攻苦不能支歲甲午六月具疏請假十四日奉

旨覽卿奏知道了着用心調理。稍痊卽出供職隨令御前大人臨寓憇問繼遣太醫診候屢賜珍藥。親諭火灸可療。隆恩篤眷真不啻家人父子。至九月未痊復具恭陳謝悃一疏十五日奉

旨覽卿奏知道了着用心調理稍痊卽入值辦事。十月有微臣痼疾難愈一疏十七日奉

旨卿用心調治不必求罷。十二月有病劇萬難供職一疏初五日奉

旨卿還安心調理。病痊之日照舊供職。公旣屢疏乞休。

未蒙

俞允乃

恩眷逾涯歲乙未正月十日特晉太子太保十八日有寵命不敢仰承一疏二十日奉

旨晉加新銜特昭眷注卿其祗遵成命不必遜辭時公病日劇復

命總裁

順治大訓公以疾辭二月有病劇萬難供職一疏聖意實知公病重勢難勉留十三日奉

旨覽卿奏病難速痊。特允所請。着以太子太保新銜回籍調理。病痊之日。候旨召用。仍賜衣服鞍馬。還馳驛去。昭朕優眷至意。二十日具疏謝。

恩二十二日奉

旨覽卿奏謝甚切。朕懷須益加調攝。務期痊可。以慰眷注。公還里甫閱歲。

上念公不置于丙申年。月特遣內官王應聘

御前近臣王有恒賚

敕存問賜羊酒。

敕云卿受朕深知早參大政而能不阿不激小心匡贊
一載綸扉多所裨益迄今間濶年餘彌深軫念卿其
慎起居爲國家愛身佞性召用公感念

厚恩涕泗交頤恨捐糜莫報自此杜門却掃日從事藥
餌間暇則訓諸子勉以忠勤孝弟嘗曰功名事不可
強求當修天爵以俟人爵吾自童子試以至入相及
蒙恩賜歸從未曉干求二字今世俗囂薄苟且功名
將來闡試必有大禍爾等當潛心聽命勿生非分之
冀及丁西南北闡事發言若左券又嘗諭子早完國

課云江南官戶多逋欠將來必有創懲并以此勸告
親友不久卒于奏銷悉如其言居鄉十載嫉俗尚之
侈靡力行恭儉以身爲士民式居取容膝食無兼味
羔羊素絲之節位彌尊而守彌固癸卯歲

世祖章皇帝梓宮入山陵聞余匍匐馳送公力疾偕行
時有淺識者從傍竊議公弗顧也比扈從至

陵哀號攀慕余兩人相對痛心悽動班聯從

山陵回公卽嘔血數升以炎暑勞頓病遂增劇旋于五

月初十日偕余辭

朝同歸長途並轡不減夙昔之追隨綸扉時親笑語而
余已察公之病勢覺有進無退矣歲甲辰病益甚旬
日著格言數章垂勸世俗刊布流傳四月十八日之
夕忽呼諸子云吾欲去矣只受

朝廷厚恩未報柰何北向九叩而瞑曾無一語及家事
也嗟乎公四歲而孤奉母氏教誨勉下帷雖名列賢
書嘗寄居蕭寺夜分更闌咿唔不絕甚而或繼以泣
其劬勞罔極之思纏綿痛切有如此若夫子處孤館
拒少婦之乘月窺戶以至碎玉却婢而終身不言其

人其心事正直忠厚可以告天地而質衾影有如此受知

聖主重其文章氣度超陟揆輔不色喜偶蒙譏于甘食不色憚其蘊藉沉深學識凝固上足以結

主知而下足以協輿望有如此至其奔赴

山陵號慟慘怛卒至銅疾遄發嘔血增加臨革之言忠勤出于至性此又蓋臣事君之大節生死無二者矣余與公交十餘年見其恬靜冲和嘗歎然若不足而識見明確然諾可否介石不回喜揚人善不苟叱人

過下御臧獲亦惟寬恕爲先平生干請之戒甚嚴而
故人寒士有負奇冤莫白者輒不惜冒嫌拯之總之
公律已也介與人也溫事君也忠交友也信嗚呼凡
此皆有合于聖賢之道者公真不可及也已公生于
癸卯年之八月二十四日戌時卒于康熙甲辰年之
四月十八日亥時享年六十有二爲之銘曰

卓哉呂公四歲而孤母教是奉龜勉勤劬沉酣墳典
寒暑弗逾夙興夜寐孝思瞿瞿持躬正直昏暮罔渝
積德于陰爰顯屢符擢天下魁猶寒素如

先皇右文器公大儒詞翰寓規警戒盤于晉陟銓佐翼

贊

廟謨以疾請告妬口揶揄

帝鑒厥誠寵賚有殊

隆恩存問曠典古無公感知遇遑恤瘁瘡癸卯

山陵負疾長驅撫膺一慟捐生是渝大節細行毋有稍
踰德大必壽胡公未孚殆昌于後子孫攸許毘陵之
陽修賢之隅我銘公藏千載爲模

金文通公集卷之十二終

金文通公集卷之十三目錄

吳江金之俊豈凡著

前中憲大夫福建觀察使菊存張公墓誌銘

前光祿大夫太子太保戶部尚書靜涵張公墓
誌銘

贈通奉大夫內翰林弘文院學士岐山朱公暨
配封夫人沈氏合葬墓誌銘

誥封中憲大夫浙江按察司副使幼儀秦公贊
配華恭人合塋墓誌銘

金文通公集卷之十三

吳江金之俊豈凡著

前中憲大夫福建觀察使菊存張公墓誌銘

公諱晉徵。字恭錫。號慕蓼。別號菊存。其先世實宋魏公裔。自南渡後。數傳而至諱辛三者。徙居禾之太平里。遂爲嘉興人。辛三生洪。洪生正。正生世華。世華生用。字柳溪。以次子貴。封戶科給事中。生三子。長諱應。

潮字海濤。邑廩生。生子棐。字心日。邑廩生。生子廷薦。字履台。登萬曆辛丑科進士。歷任刑部主事。次諱應治。字冲泉。登嘉靖壬戌科進士。由給諫歷任山東臨清兵備副使。季諱應濂。字衍溪。邑廩生。卽公大父也。公父諱榮。字碩懷。邑庠生。以公貴贈福建觀察使。生子三人。長卽公也。公生甫七日。妣曹恭人見背。考碩懷公同王母杭太孺人撫恤成童。六歲就家塾。性穎異。不好爲群兒弄。公家世取甲第者。皆以壁經贈。公喜公慧。因卜所授經。獨麟經。協兆爰從伯氏仲銘。公

手授四傳。目數十行下。無少遺忘。天資既敏。妙而又潛。心鮮他嗜。一時宗族戚屬咸識其爲大器。年十七。補弟子員。聲蔚庠序。年十八。丁繼母。卜恭人艱。哀毀逾節。讀禮之暇。輒發憤自勵。咿唔丙夜。不息。其爲制舉義必洞抉題旨。匠心破的。不屑屑襲時吻。歲辛酉入棘闈。本房司理。鄭君拔送主司。以策語微激抑之。下第歸公。志益奮。學業亦日益進。乙丑春仲。贈公忽邁疾捐館。公號痛欲絕。偕仲弟萍止共襄喪葬。比時家業蕭瑟。自勉營窀穸。後爲門戶計。至艱辛也。季春

贈公舉遺腹子卽季弟躬鑒撫育之如已子延師訓
迪卒克成立雁行三人雖長幼差殊怡怡友恭曾無
間言公因家食不支館穀黎川半邇者累歲悉以家
事聽次公料理舌耕硯田意泊如也庚午登賢書出
蔣慕皆先生門特以麟經受知石齋黃太史辛未鍛
羽歸讀書茗溪益奮發如諸生時甲戌成進士爲管
誠齋仲子復兩先生所拔釋褐除知閩縣事閩居省
會要衝冗務如蝟案牘山積夙號難治公淬礪新硎
圖之諸凡民瘼利弊嘔心講求力任興革夙夜拮据

不追會海孽劉香大吹鯨浪。賴公轉餉軍前，獲資飽
騰事平紀功。因首及焉，丙子大比士爲本省房考官。
得士六人，皆一時名宿。適石齋黃太史講學樵桐山。
岱嶽自矜於邦之賢士大夫，鮮所許可。而獨景重公。
逢人說項。於是聲益起。無何，中丞某憑寄耳目，搆求
洋事，頗多株累。公洞燭而心寃之。毅然曰：殺人媚人。
吾不能也。因而釋者甚衆。拂當事意，調新安之婺源。
簡僻易治。然公未嘗有易心。其殫精惠愛，猶之治閩。
也不二載，擢刑曹部例提牢屬新咨。公適膺其役。正

值石齋先生抗疏獲罪。廷杖詔獄。公慮朝廷有殺諫臣名。爲之維持救護。不遺餘力。匪僅以師弟情誼效。流俗之周旋也。轉員外郎。恤刑中州。公念人命至重。死者不可復生。斷者不可復續。加意平反。全活倍多。今恤疏具在。仁人之言。不與歲月俱逝也。時流氛孔熾。河洛一帶尤被蹂躪。公雖無城守責。恒與守土諸司環甲登埤。一日夜常數十驚。未嘗以使客偷安置。地方於膜外也。繼以才望出守江西之建昌。益藩府第在焉。藩素擅賢名。爲各藩冠。而時方隆重藩體。勢。

炳頤張。伺察督責。綦嚴且密。稍忤意。卽飛章劾奏。動得重譴。有司多救過不暇。公事事謹毖。不開以隙。遇有事關民社者。是非可否。公屹然持之。不爲所撓。藩亦甚敬而愛之。署巡道篆。賊正流毒袁州。九江。銅不。可。鄉。聲。言。窺。建。昌。警。信。日。迫。人。心。惶。惶。益。藩。有。暫。徙。樵。川。之。令。公。陳。大。義。攀。轍。莫。止。亟。飭。將。卒。護。行。以。司。理。黃。君。隨。民。爭。竄。徙。城。中。爲。之。一。空。公。獨。以。隻。身。死。守。繕。器。械。募。鄉。勇。嚴。備。禦。密。間。諜。常。單。騎。巡。城。指。郡。門。一。井。誓。曰。設。有。不。測。當。覓。我。骸。骨。於。此。中。也。軍。民。

咸泣下。還警晝夜不懈。公雖身駐盱江所轄撫屬諸邑密邇袁界。公飛檄偏裨。統兵預扼要害。賊偵知有備。未及境而遁。遂啓請藩歸。先是藩行時被土寇渠首曾斗墟等刦貲鉅萬。時城守方嚴。恐搜捕太急。激生他變。姑置不緝。遂陰行察訪。廉得主名。密授所司方略。乘雪夜掩襲。群盜以次就縛。立置之法。餘脅從悉縱弗究。追餉完藩安堵如故。合郡紳民勒石紀功。督撫交章薦其能。冢宰徐虞求先生歎曰。張太守以白面書生保全孤城。翼衛藩室。曾無勁兵宿將爲之。

犄角聲援真奇男子也。擢福建按察司副使備兵建
南地方久弛武備。緩急靡恃。公勵精整頓。軍容肅然。
咸稱閩南一重鎮。云旋陞按察司使。時有驕兵悍將。
爲民害者。公治之如律。不稍貸。外臺之綱紀聿張。實
於公有厚賴焉。未幾。

王師入境。公識時投誠。繳印謝事。旅寓仳離。茹苦萬狀。
丙戌秋。孫恭人抱病長逝。長子亦復不祿。骨肉摧傷。
相繼而至。復遭僞寇竊發。幸公素得民和。獲免於難。
琴鶴之外。罄飽賊掠。時相從患難中。四顧無依。惟季

弟躬鑒一人而已。戊子還里。憂毀困頓之餘。形神交悴。堅臥一丘。無復用世意。慕陶靖節之高風。自號菊存。以見志焉。終日杜門。郤掃書史。是親間從二三朋舊。道故言歡。風清月朗。相與嘯傲鶯波。恒樂而忘返。除公事入室外。曾無片紙寸牘。干及當事。以是人競。高之連舉二胤。旋復夭殤。天道其可問耶。公深自訟。省益孳孳。累善爲事。戊戌春王。舉鄉飲大典。郡大夫素式其賢。特徵重大賓。輿論僉允。己亥菊月。舉一丈夫于癸卯嘉平月。又舉一丈夫。子仁者有後。天道未

始不可問也。至是而公之喜懨可知已。方將拭目二子比肩逐隊。繞膝迎幃。他日聯翩接武。公之桑榆暮景。當何如其愉快哉。不意乙巳春三月。一病委頓。遂於十三日赴修文召也。以善人如公。而遽奪之算。然則天道其終不可問耶。公易簣前一日。猶神明湛然。條理井井。呼二子至榻前。執手而言曰。讀書做人。毋負家聲也。又囑仲季兩弟曰。善撫此二孤。勿爲他人笑也。言訖。瞑內。典所云正念分明。捨報安詳者。公庶幾近之歟。大約公之夙根深厚。非流俗恒情區區。

兒女子態所可彷彿也。先於甲辰冬，集親黨昆季處分家事，周贍族戚，寧厚勿薄，寧詳毋遺，條分縷析，親筆鉛記，燦若列眉指掌。公所以爲兩孤計者，益至深遠而曲當矣。非平日有學問明道理，審義命度，越儔輩數倍者，能如是耶？公一生爲人，恬靜冲夷，常退然若不足，一切世味毫不以滯其胸。與人交了無岐峽，而涇渭不撓接之者，蓋如春風又肅如秋氣，祇覺其可親而不可曖也。至其御下寬仁，從無怒容，暴色良由天資長厚使然。公飲不能數合，而樂與客盤桓終

席靡倦口不談俗務而遇事剖分劃然莫能易嗚呼。
公真不可及也。自遊庠以迄宦成歷盡荼苦。鳴琴兩
地則惠愛有聲奉命欽恤則不愧治獄于公一麾出
守則克稱良二千石淳歷臬憲之間則無忝外臺之
振綱飭紀公真不負學不負官爲不可及也。惜乎天
旣報之以功名而弗與大竟其用又終報之以胤嗣
而仍蘄其長年弗獲目擊兩孤之成立哀哉吾終不
能無致疑於彼蒼也宜乎公嘗自歎曰他人歷境苦
盡則甘而余則終身於苦中也雖然公兩孤雖藐已

漸露頭角又有仲季兩賢昆。感公手足之愛。始終勿替。必能竭力保孤。以捍外侮。勦內政。提攜有成。翹足可俟。是苦則公嘗之已盡。而甘則悉貽之後人也。亦可以無憾也已。公生於萬曆辛丑正月二十三日。卒於康熙四年乙巳三月十三日。享年六十有五。崇禎庚午舉人。甲戌進士。累官中憲大夫。福建按察司使。元配孫恭。人生於萬曆甲辰四月初四日。卒於順治三年丙戌九月初九日。享年四十三歲。繼配章孺人。生於天啓乙丑八月初三日。卒於康熙三年甲辰十

月初四日享年四十歲生男二長玉曉章孺人出聘
余曾孫女次金城側室卜氏出聘觀察使若華盛公
曾孫女生女二長女孫恭人出配冢宰謚莊簡五臺
陸公曾孫涓次女章孺人出許配禮部鼎陶吳公孫
讓木其詳列行狀中不具書擇今康熙四年十一月
初八日庚寅葬秀水縣盧家佃上字圩之新阡以元
配孫恭人繼配章孺人祔焉其孤玉曉金城齋行狀
來以誌銘屬余余與公爲中表弟兄稔公之生平本
末與夫居官梗概洵足以則今垂後何可使之湮滅

不彰而忍以不文辭也爲之銘曰

賦性兮溫良。制行兮孔臧。蠻窓攻苦兮擅名文章。宦途駁歷兮震譽官方。東山高臥兮謙尊而光。周恤宗黨兮惠溥情長。聽臨訣之遺言兮令人撫膺而悲傷。信天道之福善兮應知積厚而流光。壽不滿古稀兮已播令聞於無疆。縱金石可銷兮吾直謂公也不亡。

前光祿大夫太子太保戶部尚書靜涵張公墓

誌銘

康熙八年歲次己酉冬進士張君光第泣持其先人宮保大司農靜涵公行狀來屬余誌其墓併爲之銘。蓋以余與公同登己未南宮榜有通籍之雅且相得甚善以是屬余嗟乎余浮沉宦海幾四十餘年。

今皇上御極得蒙

恩心子告始歸老林泉優游田里屈指同年友見在家居壽考者落落晨星若公當日品行甚高潔居官多經

術。且余庚午以後。歷宦豫楚間。嘗與公後先同地。同官知公最深。每慙步趨弗及。今讀其行狀。不禁潛然泣下。雖衰憊不文。其敢爲公辭謹。按狀。公諱有譽。姓張氏。號靜涵。其先世居無錫之景雲鄉。曾祖諱輔。號玉溪。始占籍江陰之青陽里。大父諱汝翼。號澄源。邑廩生。崇祀鄉賢。父諱履正。號岵望。前壬辰進士。任廣信府知府。崇祀名宦。以公貴。三世皆得贈宮保尚書。累葉或隱或顯。代有碩德。令聞炳耀。于時公生而岐嶷。不好嬉戲。童年卽嶄然露頭角。曰。吾先世以孝友

仁義起家。母或墮紈袴。習益早。以名世。大儒爲已任。已年十二。隨父任南中。時祠部葛屺瞻先生官舍相鄰。往受業焉。先生以大器目公。年十七。婚甫逾月。卽之南中就學。十八縣試童子第一。是年遊郡庠。乙卯舉鄉薦。已未捷南宮出闈。脾疾作。且憇。心動不俟。捷卽出都門。而父訃適至。號泣馳歸。抵家病益甚。力疾居喪。不出戶者三載。壬戌得殿試二甲。應授北部。公念母老。不欲離左右。力求改南。舊例。北部改南。應得禮部時無缺選。君遲焉。公遽就南。戶部主政。以遂

其迎養之志。居久之。北新關缺。太司農具疏薦公力辭。乃就蒲口倉差公蒞倉事。革冗役。裁雜費。而倉耗減其十之三。其收米必平斛。給軍必滿斛。用是屯種積欠。爭先輸納。倉糧遂足。大司農嘉公清廉任職。必欲委以關事。浦差未回。卽題椎邢關公復辭不獲。公之主權也。專以恤商爲主。時小關久閉。用防漏越。居民生逕往來。殊苦不便。公至卽開之。以便小民。而於商稅仍無漏越之虞。較淮櫃等驗定船尺。正額完足。五尺以下小舟。卽時開放。行旅如流。歌呼載道。當是

時璫禍正熾。凡官地方者。凜凜懼不克當。奔趨恐後。揚州建魏祠。郡邑咸集。獨關使者不至。久之。醴臺遣吏來趨公。公毅然以疾辭。卒不至此。公居南曹時。首擢逆燄之一大節也。榷關纔七月。陞饒州守。公之治饒也。力省詞訟。奸黠之計罔施。禁絕餽遺。苞苴之路不行。月兩課諸生。與司李分較甲乙。鼓勵秀良。捐俸修郡邑學宮。併建尊經閣。置長桌於內。以供月課。一時文士。蒸蒸向風。其留心教化如此。公尤尚德緩刑。凡朔望必稽監簿。自徒刑以下。悉從保釋。每季必親。

至獄中省視疾苦免其饑寒暑濕之患恩不斬于罪
因此公之治饒卓狀號良二千石之大畧也是時方
嚴參罰郡邑有司降級俸有差饒屬餘干樂平積逋
最多公列參第二時謝夫人卒于署公以悼亡之餘
思欲掛冠會江省糧道缺撫軍具題帶降二級陞督
糧道副使公去饒饒民德之因祠焉公之在饒也具
悉官旗兌運蠹弊因盡心釐剔江右一省糧倉皆布
列會城章江之濱糧官運省交兌公爲親驗米色額
限贈耗搭配停勻更設立長單欵列需索陋弊犯者

令官旗填註繳驗。諸軍貼然。且無米色參差。贈耗偏枯之異。軍民便甚。往時江省漕欠極多。至是各縣俱有餘米。余辛已官江右。亦承乏糧道。時已逼除倉卒受事。悉倣公成法。而斟酌行之。幸是年竣運亦最早。先是建昌屬邑船戶舟覆。失米百石。久繫無補。公將餘米補完。放釋船戶。糧艘抵淮。因駱馬湖溜急。船不得渡。公令每船帶泥十擔。不數日而隄成。遂通縛挽。又議每船派夫二名。過溜如駁。河水多泥。飲者病腹。公爲捐俸施茶。人人德之。丙子秋天津告警。漕艘倉

皇運卒多逃逸。各省督漕不至。公加工價。并派船出夫二名。退入海口。防護巡守。身乘飛棹。往來慰諭。衣不解帶者兩月。漕以得全。是年江運獨先諸省。丁丑舉卓異。陞七省漕道。公往湖廣督兌。閘水淺。則令運船入閘。卽下板。水盈始放。晝夜督催。不停分刻。省起剝無算。十三把總運竣。謝薦。及各州縣長夫。例有餽贈。公一槩禁却。漕臺楊君問曰。院例皆收。公何獨却也。公曰。院差僅一年。謝薦可收。道運完仍留任。若受餽。彼將無所憚。轉索官旗。不可禁戢矣。楊君歎異久。

之公廉得松郡上海兌獎。按部水次爲飭漕規。平耗贈衛弁各相戒。無扞公法。倉棍衙蠹亦鼠竄潛踪。旬日告竣。省民間米數萬。松人建祠戶祝。此公督漕時聲望蔚然之大畧也。戊寅下母艱。公時爲職守所羈。未得親視。含殮。嘗以此抱終天之痛。因茹素三年。時荆溪再召。注意公欲邀一商。將引之大用。公以憂謝。竟不赴服闋。補順廣道。赴任會值大荒後土賊充斥。公親巡各縣嚴保甲核虛兵務厲軍實。爲有備無患之至計。壬午遷蜀臬。公槩却長夫如前。癸未春始

抵任時冢宰鄭公三俊疏薦公堪任撫軍初推登撫再推秦撫皆不得旨時大計舉天下大廉能五人公實居首奉有先予褒旌仍紀錄優擢之旨真異數也公在蜀兼總藩臬篆文移菊午公案無留牘有欽案擬贓千計力爲申豁藩司解銀裁革平耗立刻收兌屬邑暨小民無不稱便臬司詞過半年槩准註銷郡縣贖錢率多蠲免此公任蜀臬時左畫方右畫圓游刃肆應之大略也癸未陞應天府丞士民皆號泣攀轅久之得代歸時藩吏以存庫金五萬請充清橐公

麾不納。會倉場員缺數推不稱旨。最後屬公乃得旨。
以南京戶部侍郎兼右僉都總督倉場上屬意公。嘗
于御屏指公名曰。張某是一清官。且語忻城伯趙公。
趙以實奏。上爲拊髀。至是始膺特簡云。公歸自蜀。驚
聞流逸之變。受事南中。歷少宰大農晉宮保。追贈三
代。如其官乙酉五月入武康山。不問家事。往來深巖
絕壑中。凡二十五年。不飲酒食肉。不入城市。不謁官
府。會奉部徵不赴。臺薦亦力辭以免。康熙元年。公子
光第以明經貢于京師。越明年癸卯。舉順天鄉薦。六

年丁未第春官其存心忠孝制行高阜甚類公公之積學篤行亮節鴻材受知主上而每遇阻尼時論傷之蓋天以公之大業發于其子也流芳衍澤霞蔚雲興正未可量已公居官無宦橐家居不免窘困而處之恬如嘗晏坐一室手不釋卷著作之富盈箱溢篋諸凡地方利弊必委曲條上當事鄉邑蒙利賴焉壬寅大潦公首倡同里施粥全活甚衆甲午集子姓于宗祠講學闡析微義遠近赴者嘗四五百人每月課藝而差等之凡以文字來質者評論夜分無倦色故

公。里。文。風。士。氣。甲。于。一。邑。公。之。教。也。嘗。述。父。廣。信。公。
之。言。曰。居。官。以。清。廉。爲。本。清。廉。則。無。才。而。事。自。理。不。
威。而。人。自。服。此。吾。生。平。佩。爲。韋。絃。子。孫。當。世。守。者。也。
述。叔。父。約。所。公。之。言。曰。居。身。以。誠。實。爲。本。一。句。虛。言。
被。人。看。破。則。一。生。言。語。無。人。聽。信。此。吾。生。平。刻。自。檢。
點。子。孫。當。敬。佩。者。也。又。曰。事。先。以。孝。敬。爲。主。未。有。不。
敬。祖。宗。而。致。子。孫。昌。盛。者。待。族。以。和。厚。爲。主。未。有。不。
能。和。好。宗。族。而。能。蒙。祖。廕。者。此。吾。三。代。以。來。家。法。吾。
常。以。之。自。勉。服。之。無。斂。子。孫。當。永。永。遵。守。者。也。又。嘗。

戒其子曰。反身務要知足。須作退一步想。處世不越情理二字。世故不通達。只爲執理太過。不能體貼人情。若以情通理。便事事無礙。讀書之法。須一一銷歸自己。方受用得著。否則紙上陳言耳。其處身勵後。有若此公性至孝。幼好奕。稱國手。嘗爲父解圍。以爲笑樂。自父歿。終身不觀枰局。謝夫人孝事姑。甚得母歡心。夫人卒于饒署。不及永訣。公傷悼倍至。後走黔蜀間。以夫人坐椅自隨。其外家墳塋。與祖壘址近。祭則必先往奠焉。昆季三人。公居仲。恭愛兄弟子姓長幼。

視同。一體。或子姓中間有過舉溫顏諭導無凌厲之色。鄉黨有事曲爲調解。非意相加。未嘗與較。御僮僕雖嚴。不加笞楚。訓告不啻如子弟。其敦本善俗。有如此居恒尊事孝經。曰民行之本。聖教之宗。且行在孝經孔子所自道。因手箋義衍補一書行世。初里中有常惺師。姓馮氏。以廣州別駕雍髮立放生池于故居。以八年伯沈周兩公書致廣信公。求爲護生。書至而廣信公歿。公得書慟哭焚之柩前。自此公終身護生。嚴捕捉之禁。月買生放。蓋成先志。非獨修善因也。每

樂與諸禪德談出世事。沉酣內典。大有領悟。及持身處世。謂必當以孔子爲師。如方員之有規矩。故入山不異繙流而居家。一循儒禮。素奉先賢遺訓。在饒刻胡敬公居業錄。在蜀刻來瞿塘易說。廣爲流傳。督漕山左。徘徊仲夫子祠。訪其子弟。拔其尤二人送學使。俾青其衿。公之崇正道恤賢裔。有如此。嘗于河次見縡夫貌類書生者。病幾殆。詢之。河南王氏子。爲後母所逐。試一藝。頗佳。遂厚予衣食。諭以閔子之孝。爲改名學。騫送原籍。至則其父母方與其妻家訟。乃完聚。

同好。卒爲中州名士。以孝聞。公在饒所取士。纍纍科第。門牆桃李實繁。此尤公愛惜人才。嘉與後學之素心也。歲己酉。邑行鄉約。公率子姪。往涖厥事。諸人講畢。公登席。發明六言之義。懇切真摯。聞者無不感動。流涕。病中書問必親屬稿。皆勤勤立身修行之事。或以節勞爲言。曰生苟不以利濟爲念。徒求安飽。雖生猶死也。年逾八十。數過時可聽之而已。卒之前。猶諄諄遺訓子孫。云年已八旬。時至卽行。爲子孫者。當以誠實存心。以敬謹持身。以孝友事親。以勤儉治家。以

謙厚居鄉。以清慎守官。以忠貞報國。以讀書爲世業。以聖賢爲師範。此則克家之子。繩武之孫矣。嗚呼。讀公遺訓數語。真古聖賢範世之準則。移風易俗之格言。渺論匪直。公一家之著鏡已也。平時心折靈巖和尚。遙至永訣。遂不復語。夜半。命解衣。曰。吾一絲不掛。盡去諸縛。及時惟呼母。再三。遂瞑。所謂正念分明。如入禪定者。非歟。余于是按公一生。事親孝。事上忠。兄弟友。夫婦睦。接下溫。自始至終。操持凜然。大節細行。未之或墮。以之入世。而全體大用。無不該。以之出。

世而真參實悟。確有據洵所謂真能入世者。方能出世而曾不以富貴功名淳靈性之本來。真能出世者方能入世。而又不以虛無寂滅掩大儒之功用。人生至此可謂體受歸全而無毫髮遺憾焉者已。爲之銘曰。

維公之德。以孝爲先。周于六。行人倫罔愆。高潔性成。
筮仕尤堅。署必就冷。差必辭彊。璫礶方熾。排衆挺朕。
榷關治郡。商民二天。釐剔漕弊。董運獨前。歟歷監司。
肆應皆圓峻。却庫遺四知。是虔權要來親遠。若免焉。

清官之名。宸鑒高懸。迨陟卿貳國事。已顛蕭狀窮居。
二十五年講學。尊經明道。捲捲賑荒講約。爲善綿連。
戒勉子姪。務執聖賢遺訓。諄諄可法。可傳研窮理學。
程朱比肩。苟及竺典。了悟入塵。用世出世。均陟其巔。
坦視生死。允稱歸全。子子孫孫。音徽永宣。爾昌爾熾。
百祺勿遷。

贈通奉大夫內翰林弘文院學士岐山朱公暨
配封夫人沈氏合塋墓誌銘

朱公岐山諱三鳳。上世深州靜安人。宋時有諱珍華者。始居義烏之梅隴。五傳而生肇。博物洽聞。饒有幹濟才。受知明成祖。以戶科給事中出鎮江右。樹駿流鴻政績。赫然所著有撫安事錄等書。藏于家。又五傳而生秀。秀生天勤。是爲公考。累世皆有隱德。負長者名。公生而敏穎。志履卓犖不群。問業受經。塾師以大用期之。繼念厥考力作經營。仰事俯育。終歲捐捐莫

與分臂指勞。遂廢書而歎曰。吾不忍老者勤而少者逸也。因躬被襪襪。鋤雨犁風。必身先之。已而食指漸繁。養娘弗繼。遵父命遊燕邸。居積什一。畢慮殫心。不顧瑣屑。勞瘁然賦性端方。言矢金石。行質鬼神。有一介不苟之操。當世賢豪多樂與遊。卽王公貴人見輒賓禮。不數年生計漸饒。足資里門菽水。始釋厥考。仰事俯育之累。公乃稍稍得安枕矣。尤仗義矜然諾。有貧窶困苦。婚喪不克舉者。必爲之悉意區畫。毋令失所。後已縱倉卒告急。鮮弗立應。以是橐中裝數盈數

落終不獲以素封名也。今總河大司馬梅麓初生八
識其有異必能大亢我宗。甫脫乳卽趨就外傳延禮
四方名師碩友。朝夕切劘罄所有爲修脯資絕弗靳。
嘗一隸銓曹從事冀博半通之秩。了一生耕讀債已
復思窮達前定與其蛇行蒲伏仰人鼻息曷若專力
課子光昭詩書先澤之爲大哉。竟棄不就比聞考訃
徒跣奔歸竭盡哀戚。自公還里居喪後生業盡廢。平
時嘗受德者往往見背或甚而反加侮焉在旁觀者
目擊生死交情炎涼反覆不勝憤忿。公怡然處之毫

不介意。且庭訓司馬君曰。汝不聞朝趨市者。側肩爭門而入。日暮之後。掉臂不顧。此世態之常。今古同然。無足尤也。每爲陳祖宗承家積累之艱。與夫前人往事。賢否得失之蹟。某也當戒。某也當儆。亹亹不倦。倘燕閒侍坐。或微有跛躋懈色。亦譴責不稍貸。其義方之端嚴細密。類若此會。

清朝鼎興。司馬捷南宮。讀中秘書公貽之書。曰吾家世耕。讀今汝幸席先蔭。掇科第如拾芥。又與石渠天祿之英。肩隨染翰共沐。

恩寵造物之予我者奢矣。奢則須持之以約慎勿驕侈。肆志滋我老人憂其謹識之毋忘。司馬君之位大而心小。名高而實副皆公之燕翼。貽謀有以致之也。公故好飲日與親朋故舊曳杖銜杯盡歡乃罷。宜公之怡愉壽考正未有艾也。而公素精星家言嘗自謂吾年五十七數當止此適庚寅歲司馬君力請歸省。幸聖天子方以孝治天下朝上夕報可甫旋里未數旬公竟寢疾逝矣。嗚呼公孝友天植妣氏春秋高公年且逾艾定省承歡無異孺慕昆季三人折箸且久然

豐約與共。未嘗有爾。我之岐一從姪病痘危甚。公携置已舍。百方救療。卒保無恙。宗黨姻戚。有讀書能文章而力不逮者。必獎詡而扶植之。以底于成。郡二千石聞其風高其行誼。式廬造請。禮之賓筵。用示矜式焉。公元配沈氏。產自名族。父諱天和。母孟氏。年甫及笄。卽于歸。翁姑俱嚴重。夫人事之甚謹。問衣佐饅。罔有弗虔。方是時。諸叔幼未婚。旁無姊妹之助。并自烹餚蠶續。紉綴。悉出夫人十指。中女史中所艷稱婦德。艱辛勞勦。未有如夫人之甚者也。訓督司馬君頗峻。

篝燈課誦恒至丙夜不休。卽嚴重難事之翁若始亦嘖嘖歎其賢而相與語曰家婦宜家吾門當有興者其在是乎贈公之始而力田穡作繼而懋遷有無化居終而以通經學古澤民致君教其子皆夫人晝夜操作爲之左右以襄厥成也夫人性敦朴卽司馬君已致通顯而猶屢脫粟衣敝衣貴不忘貧如此當贈公捐館之日夫人號痛欲絕斷葷茹齋虔奉竺典晨夕不輟以資贈公冥福司馬君間以其肫純綺進却不肯御由是過哀成疾氣血內耗者甚矣嗣後就養

宦邸每一念及丘墓。輒爲潛然泣數行下。未幾疾作。
遂告終于河署所最堪撫膺太息者屬纊之際。猶捲
捲念老姑不置也。贈公生于萬曆甲午六月初四日。
卒于順治庚寅十月二十七日。夫人生于萬曆壬寅
六月二十八日。卒于順治戊戌二月初八日。俱享年
五十有七。先是司馬君爲史官時。以

吉禮告成。覃恩岐山公贈通奉大夫內翰林弘文院學
士加一級元配沈氏。封夫人。夫人之卒也。司馬君循
制泣請扶櫬終喪。

上念河務重大漕運攸關非司馬君弗克任一疏再疏
弗允所請

特詔奪情視事已亥冬始申請報可且

俞禮官所援掌故賜祭葬如制今將卜于本年七月某
日合葬贈公暨夫人于某山之原而以其狀來屬余
銘余何能文以傳贈公與夫人哉雖然余文雖不足
傳而世人艷稱公與夫人之行頗多多必則微之則
微之必相與謹視之是公與夫人之足以傳後也卽
余文之確附以傳也其何敢辭謹按狀公生丈夫子

一卽總河大司馬梅麓君娶沈氏孫男一尚幼孫女一許聘襲封衍聖公冢嗣毓沆爲之銘曰

天道可知耶。豐于德。嗚于壽。天道不可知耶。積于躬。昌于後。同坎而瘞。同簋而禋。綿綿瓜瓞。永貢。

恩綸石可泐兮。名則彌布。歲或遷兮。藏之益固。

誥封中憲大夫浙江按察司副使幼儀秦公暨

配華恭人合塋墓誌銘

康熙七年歲在戊申夏五月錫山秦封翁幼儀公卒。我吳門之士大夫奔走震悼以爲當今之老成學博而行高爲鄉里遠近所則倣莫我秦公若相與會於喪所語公行事靡不歎且泣者余亦爲文以弔之僅及公之大略及親故之情而已未能詳懿美之萬一也秋七月公之子觀察君鉞列公行事及奉公存日所撰華恭人紀畧并公之姪孫對巖太史合狀率仲

季兩文學。稽類乞銘於余。余與觀察君有一日之知。雖老不能文。敢辭公銘乎。謹按狀公諱重采。字幼儀。姓秦氏。系出宋龍圖閣直學士少游公。諱觀之後。龍圖公子湛。倅常州。遂家於武進之新塘鄉。而遷葬龍圖公于無錫之璨山。凡十傳至瑞五公。以館甥家無錫。秦氏支盛於錫山。自瑞五公始也。又六傳至兵部尚書贈少保謚端敏鳳山公。諱金。爲公高祖端敏公生二子。次曰次山公。諱汴。知雲南姚安府。次山公生三子。次曰定橋公。諱楷。邑文學。定橋公生四子。其季

念橋公。諱廷默。知金華湯溪縣。有政績。祀名宦。公之考也。配吳孺人生二子。公其次也。公生而穎異。語言行止屹如老成人。蓋自瑞五公以來。凡十一世代。爲冠族。公之幼學敏給。威儀嫋具。人不以此異公。獨其孝友性成。真懶篤摯。見者以爲非凡兒。比年甫十四。會湯溪公以覲歸。遂捐館舍。居喪次。哀毀骨立。禮節詳委。雖善居喪者。有未迨也。又五年而有母喪。方吳孺人素強飯。卒中風。公籲天求代。祈所以延年。邦疾者無不盡。比歿。引痛逾年。不御鹽酪。忘生趣者久之。

方母殯在堂時。不戒於火。前堂旣燼。火延入柩所。公懸棺號呼。火及簷而返。人共異之。以爲純孝所感也。至哀慕之思。纏綿不輟。雖細事。凡有覩物興懷。感及前人者。輒嗚咽終日。若春秋省墓。或慶事告家廟中。歔歎泣下。拜不能起。吳孺人嘗遺紵綺在笥。卽無衣不忍服。間一開視。則淚涔涔然。此公之孝。於二親終其身。如一日者。有如此伯兄先之。長公十有六年。敬事如父。一切家政。無鉅細。必請而後行。晨夕候安否。同顏色。雖終日怡怡。而恭謹謙下。曾不敢以厲行齒。

先是邑中糧長之役最爲繁重。邑人苦之。公與兄共戶而兄田較多。費亦當贏。公引而均之。曾不以多寡生較量。鼎革初。邑令籍邑之富戶派餉。人三百金而兄與焉。公曰。門戶事何可獨累吾兄。卒均任之。兄嘗有訟事。連歲糾纏。每出公必隨。費則爲之助。求援則代其奔走。甚至小舠夜行。雖戒心勿顧也。兄嫂疾病。醫藥需費。大半出公橐。後兄嘗病噎症。苦難療。公侍疾於蘇。謹視湯藥。晨夕不離。未嘗以家事過歸。凡數月而兄疾愈。歲乙酉。嫂病。中虛。時聞兵信。城市騷然。

將挈家避地。公毅然曰。嫂病非參勿療。吾可他往乎。
冒險抵閭市。參嫂病以瘥。逮丁兄之喪。哀慟絕聞。
數年猶與親朋言及。輒痛失聲不能自禁。此其篤於
昆弟見於急難。疾病死亡。以至閒居悼往淋漓感愴。
者有如此。元配華恭人。齊眉相莊。十有八年間無嘻
容。無忤色。恭人歿時。公年纔三十有五。不復再娶。因
有詩云。好取蒲團消白晝。莫將羅帳悞紅顏。蓋公自
誓意也。於是視恭人家逾厚。奉外母施孺人。迎養問
遺。不以久而稍怠。嫁內兄之孤女。如同已女。撫二子。

寒暑調護尤謹。曰。吾以父而兼母也。因自傷詩云。
朝中饋頑。百事煩支吾。未東行者裝。先謀居者鋪。此
公於夫婦之義存歿。罔間終身不渝者有如此。至於
撫愛諸姪如已子。其有過責讓亦如之。姪有僕爲人
誣盜漸侵其主。因構而求利焉。公力疾白郡守事乃
得雪。有妹適湯氏者家貧苦節。以兄先之賞厚求助
不得。間出怨言。公多方慰解。私自往遺。不終傷兄妹
間意。而伯氏竟未之知也。有從姊負公金不償。內自
慙。不往來者三十年。公饗然曰。些須阿堵奈何。以此。

遠骨肉乎。吾久已忘懷矣。後仲甥以樗蒲負人金。有欲奪其季之產以償。公又力疾告當事。卒以產歸季姊。因泣謝。歡好如初。至於恭事諸從兄弟。不異同胞。絕無間言。其羣從子姪。亦如同體。嘗書示觀察君云。做官之日少。爲兄弟之日長。此其厚族之本懷也。則又因一本之愛。所推而始終靡間。親疎不遺者。有如此。昔昆山張烈愍公。松江張瀛海先生。皆公父執烈愍之官時。有所稱貸。及殉難。公爲焚券。瀛海先生有子督學浙中。爲言者詐誤。事下浙撫。時觀察備兵於

杭公遺書喻意以雖非所職有可爲地必左右之嘗
言秀水馮公夢禎中州季公道統閩中林公某皆吾
先人考試歷官時所受其隆遇者吾子孫切勿遺忘。
倘宦途相值其必思所以報之同邑貞菴徐公令金
華力言湯溪公之德政得崇祀名宦後兩家佃僕相
爭公曰若徐公者卽有加於我猶將讓之竟置勿問
他若周急受業師厚禮通家兄弟歿身已久猶追念
感泣如初此公之於生平故舊久而不忘人不及知
而切切縈懷曾不以物換時移稍渝其木本水源之

思者有如此。嘉定欠糧一案。幾波累公家。或爲謀者。
當首讒寄。乃得免。公曰。禍福命也。吾忍嫁禍於人哉。
卒竟豁然。公嘗遊虎丘。奴拾一銖。亟命覓主還之。行
數武。有兩婦以失銖相怨詈。因舉而授之。婦感謝問
公姓。不答而去。曾買一小婢。越日來贖。其父曰。鬻女
以逋糧故。今典吏陳君陽憐而代償。知公厚德。必聽
贖也。公驚曰。胥吏中有若人哉。吾不如也。亟以女還
之。曾於吳閩買參。誤多數兩。計值二十金。公如數還
之。有黃姓者。贖田於公。其人誤以畝價三兩。既而出

原契乃二兩有奇卽歸其餘直此公之立心忠厚制行光明遇一切事以含弘廣大爲主而又絲毫不苟能揭肝腸以示人者有如此公讀書勤學冠冕膠序卒不得志於有司遂棄舉子業課其三子惟寄情詩史獨居暢咏歲乙未予奉

命擢士禮闈得長君卷器局凝重合會稽宜城一派遂以第一人舉蓋其所學洵自有原本也及對策大廷諸臣循故事讀卷畢蒙

世祖章皇帝御便殿親覽位置及第三人極其賞歎比拆

卷觀察君與焉

上喜不禁已列侍從頻承

召對賜衣命宴寵渥皆出殊數此蓋公積德耀後之明
驗歟觀察君旣歷宦途公遺書屢戒以精白一心報
國爲先又勉以勤讀中秘書備他日

顧問會

天子銳意求治內外互轉以期學有實用觀察君遂分
叅浙藩大著廉惠聲益得之庭訓爲多也公一日至
署語觀察君曰客有言汝慈祥太過者宜稍示威嚴

觀察起而謝曰。兒誠不忍敵人肌髓。充客遊橐也。公爲首肯者再。及觀察莅江右。公復之署中。聞豫章之誦聲。猶浙公大喜曰。兒固不欺若言矣。昔爾祖令湯溪。以前令逋帑金主吏繫獄者繫繫而祖蠲俸補之。全活甚衆。汝能平反無罪。而祖其不亡乎。後觀察君以失出掛議。公遺書曰。汝意在活人。以此遷謫。吾何憾哉。有武弁爲人所訐。臺檄觀察訊之。其人懷金候公於途。公曰。若理直無用求我。若曲則可令吾子枉法耶。此公之以忠良勉其子。務期報國。稱職法祖光。

前者有如此。公雖以子貴。然儉約性成。衣必數澣食無三豆。嘗徒步鄆市間。與往來負擔之夫笑語相答。有若平交。及見人有過。輒面折不顧忌諱。旣而渙然冰釋。人不之怨。見人之善。不啻已有。與人交。初終如一。郡邑咸切式廬。欲一望見顏色。不可得。至遇公事。恒抵掌發憤。爲之剖晰利害。剝斷可否。絕無詭隨。士大夫交重之。公初以勤儉治生家。稍裕。後歲歉賦急。兼有糧長之役。家竟落。癸未元日。有詩云。紀年逢五。癸涉世。得千辛。蓋自悼也。又念恭人未葬。怏怏不樂。

題云鳩拙尚成巢以我方鳩鳩不拙鶴歸猶識表。他年化鶴鶴何歸卽公之間吟寄懷其生平大略可睹已少時豪於酒客至留連旦夕尤喜讀書晚年手不釋卷每芳辰令序時花競發必邀集賓朋籃輿往會興盡而返凡蘇杭佳山水處歲必一遊性曠達不以死生爲諱先一歲豫營生圹遨遊置酒泰然自得今年夏五日汎舟容湖猶觀競渡忽次日疾作戒勿祈禱及醫藥臨革正衣冠而逝無一語及家事竺典所云正念分明捨報安祥其公之謂歟嗚呼按公之一

生大槩植根於至孝。少孤而戚。易能兼端。本於訓子。
服官而戒。勉倍至篤。愛於昆弟。吉凶憂喜之必均施。
恩於戚姻。榮枯隙好之勿間。以至與人不立崖岸。律
身一軌。準繩怡情於山巔水涯。達觀於死生夢幻。一
心不亂。無疾端逝。公真全始全終者已。雖篤學嗜古。
惜不能行其所志。然觀長君之理學政事。醇而不疵。
瞻而有體。受知於

聖主興文之世。流瀉於知人善任之朝。公之學不可謂不達。公之志不可謂不伸。後日傳之。

遺老。垂之史冊。允作人倫之儀型。公雖歿而猶存也。夫恭人姓華氏。家世邑之鷺。湖南齊孝子寶之裔也。父諱自立。號景和。篤志好學。數奇不售。晚年寄情詩酒。多植花竹自娛。暇則親課其子女。恭人生而慧敏。與兄同受訓迪。通經書。善制舉業。工五七言詩。母施氏族本相城。勤儉宜家。誨女有方。故恭人夙嫻針黹。烹餽諸內事。景和與湯溪公有執經問業之雅。相知深。故以文字幼儀公。恭人之始至也。侍姑吳孺人側。見婦端謹。心喜之。已而談言億中。試事事理。尤喜之。

曰吾得佳婦矣。凡十六月而姑見背。恭人時值產蓐。哀毀執勞不遑自顧。值冬有火災。火逼柩所。震驚悲悼。因而精神耗損。恭人事姑之日雖短。其所以致孝於姑者情甚長已。恭人少於長姒者十五年。不以比肩。自若敬之如其姑。凡事必相諮詢。至於艱鉅難爲者。又不以少而自諉也。長姒有母奉之。猶已。母視其姊。猶已。姊。猶已。姊。姊。猶已。姊。姊。問遺時通吉凶。同患幾忘。膈膜此其姊。姊。猶已。姊。姊。猶已。姊。姊。之無間然者也。封公少時困於小試。恭人勸公遊學。入郡受業於舅氏吳霞翁。寓居蕭寺。爲繼栗饋。

食紙縫浣濯不俟需時。嘗手書慰勉。絕不及家累一
字。嗣後寓居肆學。以及試事。無不皆然。至於爲子就
業。勵公同遊。其資助餽遺。亦復皆然。此恭人相夫。助
子力學之大節也。幼儀公喜賓客。與親故尤相敬厚。
恭人致其豐腆無缺供。又恒蓄嘉旨。以俟公不時之
需。至於歲時享祀。竭其誠敬。躬視烹飪。自奉則腐羹
菜羹而已。後食指漸繁。外供師塾。與戚屬往來。心許
轉劖。然能計其奇贏。終不使歲之所出。浮於所入。俾
足以繼而又持。大體非一意纖嗇。此尤中饋之饒具。

經理者也。恭人性至孝，方其嫁也，父喪未免，恭人退就私室，卽易縗以居，淚汪汪注頰，以是爲常。及姑之喪，常失聲號，以事始未久爲恨，故於送姑喪也，抱病而起，力疾奔馳，哀號於寒風凍雪之中，毀不自知。及送父之喪，則疾且更甚，扶掖臨窓，或以病止之者，曰：於此而不盡吾情，後悔何及！此恭人之事。其姑若父，殆自始至終必誠必信，而無毫髮遺憾焉者也。至於迎養已母，朝夕所需，如其意。於弟兄極其親愛，或延諸館，或相以室，恭人歿數年，猶令戚屬媯黨言之人。

人垂涕者方恭人之病劇也。封公父子藝學於郡。恐告者倉皇戒勿言。病以他事迎公及歸而病革矣。恭人之用心若此。宜乎封公紀略所云令人悽入肝脾也。其大節輝著可謂既孝且順焉矣。嗟乎。孝友如封公。力學篤行如封公。吾方虞其難爲比德者。而恭人之賢且淑焉如此。惜乎天靳以年而不克睹其子之成。竟使封公之鬱鬱以老也。然恭人以婦道完德而能使封公之伉儷情長。誓鸞膠之勿續。有賢胤之騰

驥仕路佇

綸綺之疊膺。光文史而榮家乘。亦足以不朽也已。爲之銘曰。

公篤生兮誠且恭。孝其親兮友于兄。憑棺呼兮火反風。思追慕兮無終窮。均兄役兮何齎豐。佐公輸兮憂樂通。壯失偶兮婚不重。誓再世兮羅幬空。念故交兮情極隆。還釵返價兮德莫崇。躬行君子兮實由衷。廸子文行兮何龐鴻結。

主知兮慶遭逢。勵服官兮惟作忠。嘉公德兮榮褒封。樂山水兮慊遊踪。名花時笑兮扶短筇。跡絕公庭兮侶

鄉農縉書史兮詩酒爲功嗟好逑兮溢焉先終生長
達兮泉穴同雙雙令德兮標長松宜福祿兮後胤隆
石可泐兮名不磨千秋無極兮永奠幽宮

金文通公集卷之十三終